



Erik Jensen  
Inatsisartunut ilaasortaq, Siumut

### § 37 naapertorlugu apeqqummut nr. 149/2026-mut akissuteqaat - nunat aqqi pillugit

Asasara Erik Jensen

Inatsisartut suleriaasiat naapertorlugu apeqqutitut saqqummiussannut qujanaq. Apeqqutit tullinnguuttuni akissuteqarfigissavakka.

Naalakkersuisut apeqqutit akinissanut Oqaasileriffimmut noqqaasimapput, Nunat Aqqinik Aalajangiisartunut Oqaasileriffik allattoqarfiummat.

**Apeqqut 1: Naalakkersuisut qanoq naleqassangatissinnaavaat Kalaallit Nunaanni sumiiffiit aqqi misissorneqarnissaat, taamaaliornikkut sumiiffiit aqqi kalaallinut aallaaveqarlutik aammalu uppersarneqarsinnaasut annertunerusumik atornerneqarnissaat, pisortanut aammalu sulisoqarnikkut qanoq annertutigisumik aningaasaqarnikkut kinguneqassasoq?**

#### Akissut:

Naalakkersuisut naliliipput Oqaasileriffiup paasissutissiinera tunngavigalugu nunarput tamakkerlugu nunat aqqinik aqqissuussaasumik misissueqqissaarneq sulianut attuumassutilinnut allaffissornikkullu suliassaasoq annertoq.

Suliassami ilaatigut nunat aqqisa allattorsimaffii pioreersut, najoqqutassiat oqaluttuarisaanermik tunngaveqartut, nunat assingi allagaatitoqqallu toqqortaaasivimmittut misissoqqissaarneqassapput kiisalu nunat aqqisa oqaatsitigut ingerlateqqinneqarsimasut katersorneqarnerannik nalunaarsorneqarnerannillu imaqqassalluni. Aammattaaq ornigulluni sulineq pisariaqarsinnaavoq, tassani najukkami innuttaasut, piniartut, aalisartut, utoqqaat, katersugaasiviit, kommunit aammalu inuit allat suliffeqarfiillu najukkami ilisimasallit peqataatinneqarnissaat pisariaqarsinnaammat.

Taama suliagarnermi nunat aqqisa ataasiinnarmik ateqartinneqarnerat pillugu toqqammavik suliassamut attuumassuteqartoq ilanngunneqassaaq. Januaarip aallaqqaataanni 1996-imi atuutsinneqalerpoq. Toqqammaviup siunertaa tassaavoq sumiiffik ataaseq arlariinnik ateqarpat, ilaatigut oqaatsit allat atorlugit ateqarpat, kalaallisut aqqa kisimi pisortatigoortumik atuuttussanngortinneqassasoq. Sumiiffilli kalaallisut ateqanngippat oqaatsit suulluunniit atorlugit aqqa pioreersoq nalunaarsugaareersorlu atuutsinneqassasoq.

Nunat aqqinik nalunaarsuinerup ataasiinnarmillu ateqartitsinermut tunngaviup kingunerannit nunat aqqi ataasiakkaarlugit oqaatsitigut, oqaluttuarisaanikkut,

11-08-2026  
Sagsnr. 2026 - 3567  
Akt nr. 26708084

Postboks 1029  
3900 Nuuk  
Tlf: +299 34 50 00  
Email: [ikin@nanoq.gl](mailto:ikin@nanoq.gl)  
[www.nanoq.gl](http://www.nanoq.gl)

sumiiffiisigut kiisalu kulturikkut paasissutissartaat Nunat Aqqinik Aalajangiisartunit pisortatigut atuutsinneqalernissaat sioqqullugu nalilersorneqassapput.

Taama suliaqarnermi Oqaasileriffimmit Nunat Aqqinik Aalajangiisartunit allatseqarfiusumit nunat aqqi kalaallisut oqaatsitigut eqqortumik inissisimanersut, toqqorsivimmi nunat aqqisa piffissap ingerlanerani atorneqarsimaneritik takussutissiinerit, nunat aqqinik ilisimasallit paasissutissaataannik paasiniaanerit katersinerillu kiisalu nunat aqqinik pisortatigoortumik atuuttussanngortitsinermut toqqammavimmut naapertuunnerannik nalilersuinermit misissuisoqareernerata kingorna aalajangiisartunit innersuussissapput.

Taama suliaqarneq pisariaqassaaq tassuuna nunat aqqi pisortatigoortumik atuuttussanngorlugit akuerisat toqqammaveqarluarnissaat kiisalu nunatsinni oqaatsitigut kulturikkullu eriagissannut tulluartaunissaat qulakkeerneqassammat.

Taamatut misissuinermit oqaatsitigut, oqaluttuarisaanerup, nunap assinganik kulturikkullu oqaluttuarisaanerup tungaatigut ilisimasaqarluarnissaq pisariaqartinneqartussaavoq. Tamatuma saniatigut nalunaarsuinermit, suliassamik piareersaanermit, pitsaassutsimik qulakkeerininnermit, digitalinngortitsinermi aamma paasissutissanik saqqummersitsinermi allaffissornikkut atortussat pisariaqartinneqassapput.

Aningaasaqarnikkut sulisoqarnikkullu kingunerisinnaasaasa nalilersorneqarnissaannut suliassap ersarissarluarneqarnissaa isikkussaatalu aalajangersarneqarnissaa apeqqutaassapput, ilaatigut sumiiffiit sorliit aamma nunat aqqi nalunaarsugaataareersut 33.000-it missiliorlugit amerlatigisut tamakkerlugit misissorneqassanersut kiisalu suliassaq ataatsikkut tamakkiisumik immikkoortukkaartumilluunniit suliarineqassanersoq.

***Apeqput 2: Naalakkersuisut qanoq naliliippat taamatut misissuineq Namminersorlutik Oqartussanut, tassunga ilanngullugit Sumiiffiit Aqqinik Aalajangiisartut (Stednavnenævnet) kiisalu oqartussaasut attuumassuteqartut eqqarsaatigalugit, qanoq annertutigisumik aningaasaqarnikkut allaffissornikkullui kinguneqassasoq?***

**Akissut:**

Nunat Aqqinik Aalajangiisartut pillugit Inatsisartut inatsisaat nr. 4, 1. juni 2017-imeersumi § 2 malillugu Nunat Aqqinik Aalajangiisartut ilaatigut suliassaraat nunatsinni nunat aqqinik katersuinissaq, nalunaarsuinissaq atuuttussanngortitsinissarlu, taamaattoq aqqusernit illoqannginnersallu aqqi minillugit kiisalu nunat aqqi pillugit nassuiaatinik piareersaanissaq, siammarterinissaq saqqummersitsinissarlu.

Taamaattumik nunarput tamakkerlugu aqqissuussaasumik nunat aqqinik nalilersuinissaq nunat aqqinik suliaqarfiup iluaneereerpoq, taamaattoqassappalli suliassanut nalinginnaasumik ingerlanneqartunut kalluaassaaq.

Suliassami Nunat Aqqinik Aalajangiisartut Oqaasileriffiullu suliassaat annertusissapput, ilaatigut sulianut ataasiakkaanut tunngatillugu misissuinermit pisariaqartitsinikkut, nalunaarsuinikkut, najugaqavissunut tusarniaanerit pinerisigut pitsaassutsimillu

qulakkeerinninnikkut. Taamaattumik aamma naatsorsuutigineqartariaqarpoq Nunat Aqqinik Aalajangiisartut ullumikkornit ataatsimiinnerulernissaat.

**Apeqquut 3: Naalakkersuisut isumaqarpat taamatut misissuineq maannakkut aningaasaliissutit atuuttut iluanni ingerlanneqarsinnaasoq, imaluunniit aningaasatigut sulisutigullu amerlanerusunik pisariaqartitsissasoq? Taamaappat, Naalakkersuisut qinnuigineqarput naatsorsuutigineqartut pillugit paasissutissiissasut.**

**Akissut:**

Naalakkersuisut Oqaasileriffiup paasissutissiinera tunngavigalugu naliliipput nunat aqqinik aaqqissuussaasumik nalilersuineq maanna Nunat Aqqinik Aalajangiisartunut Oqaasileriffimmullu aningaasaliissutit atuuttut atorlugit pisinnaanngitsoq. Taamaattoqassappat inatsisitigut suliaqkiutaareersut suliaassanik pingaarnersuinermit malunnaatilimmik annikillisinneqassapput.

Suliaassaq taamaattoq suliniutitut ukiuni arlalinni ingerlasussatut aaqqissuunneqartariaqarpoq assersuutigalugulu immikkoortukkaartumik ingerlanneqarluni. Minnerpaaffiatigut Oqaasileriffimmi immikkut sulisuliinissaq atorfissaqartinneqassaaq, tassani katersinermit, misissuinermit, nalunaarsuinermit sulianillu ingerlatsinermit suliaqartussamik aammalu angalanernut, angalanermit misissuinermit, ilisimannittunik suleqateqarnernut, digitalinngortiterinermit, siammarterinermit kiisalu Nunat Aqqinik Aalajangiisartut ataatsimiikulanerulernerannut aningaasaliisoqartariaqarluni.

Pisariaqartinneqartut tamakkiisumik eqqortumillu maanna taaneqarsinnaanngillat, tassani assigiinngitsunik ersarissanissaq pisariaqarmat: Siullertut suliniutip annertussusaata nalilersorneqarnissaa ersarissarneqarnissaalu; aappaattut nunat aqqi qassit pineqassanersut; kingullertullu piffissaq qanoq annertutigisoq atorneqassanersaq.

Taamaattumik suliniutissaq erseqqissumik nassuiarneqartariaqarpoq kiisalu piareersaataasumik misissuisoqartariaqarluni tassungalu atatillugu aningaasartuutissanut naatsorsuusiortoqartariaqarluni.

**Apeqquut 4: Naalakkersuisut naatsorsuutigaat sumiiffiit aqqisa attuumassuteqartut allanngortinneqarnissaat kommuninut, innuttaasunut imaluunniit inuussutissarsiortunut annertuunik aningaasaqarnikkut imaluunniit allaffissornikkut kinguneqassasoq?**

**Akissut:**

Naalakkersuisut Oqaasileriffiup paasissutissiinera tunngavigalugu naliliipput suliamut tunngatillugu misissuineq immiini nunat aqqinik allanngortitsiinnarsinnaanngitsoq. Allanguineq Nunat Aqqinik Aalajangiisartunit nunat aqqinik atuuttussanngortitsinermit toqqammaviit atuuttut naapertorlugit suliarineqassaaq aalajangiiffigineqarlunilu. Nunat Aqqinik Aalajangiisartut atuuttussanngortitsinermit toqqammaviat uani atuarneqarsinnaavoq: <https://oqaasileriffik.gl/nunat-aqqinik-aalajangiisartut/>

Nunat Aqqinik Aalajangiisartut nunat aqqinik pisortatigoortumik allannguippata oqartussat suliffeqarfiillu attuumassutillit namminneerlutik nunat aqqisa allattorsimaffiat pisortatigoortoq allannguutinillu nutaanerpaanik imalik Namminersorlutik Oqartussat Tunngaviusumik Paasissutissaataasiviat aqqutigalugu aasinnaavaat.

Aningaasatigut allaffissornikkullu kingunissat pingaarnertut tassaassapput nunat assinginik nutarterinermut, databasenut allanullu paasissutissiinermi nittarsaassinermilu atortussanik attuumassutilinnik suliaqarnermi aningaasartuutit pisariaqalersinnaasut.

Innuttaasunut inuussutissarsiornerullu iluani kingunissai annertussanngitsut naatsorsuutigineqarpoq, tassani aqqusernit illoqannginnersallu Nunat Aqqinik Aalajangiisartut piginnaatitaaffiginngimmatigit. Taamaakkaluartoq nunat assinginik nutarterinermi allanillu nittarsaassinerni allaffissornikkut aningaasatigullu kinguneqarsinnaapput.

***Apeqquut 5: Naalakkersuisut isumaqarpat taamatut suliaq ingerlanneqassappat inatsisini atuuttuni allannguuteqartoqarnissaa pisariaqassanersoq? Taamaappat, suut allanngortinneqarnissaat pisariaqassanersut paaserusunnarput.***

**Akissut:**

Nunat Aqqinik Aalajangiisartut pillugit Inatsisartut inatsisaat nr. 4, 1. juni 2017-imeersoq malillugu misissuinissaq ingerlanneqarsinnaasoq Oqaasileriffimmit nalilerneqarpoq. Naalakkersuisut tamatumunnga isumaqataapput.

Nunat Aqqinik Aalajangiisartut nunat aqqinik katersinissamut, nalunaarsuinissamut aamma atortussanngortitsinissamut kiisalu nunat aqqi pillugit nassuiaatinik piareersaanissamut, siammarterinissamut saqqummersitsinissamullu piginnaatitaaffeqareerput pisussaaffeqarlutillu. Oqaasileriffiup allatseqarfittut suliamut tunngasut allaffissornerillu aalajangiisartut sinnerlugit suliarissavai. Taamaattumik Naalakkersuisut inatsit § 2, imm. 2, malillugu Nunat Aqqinik Aalajangiisartunut inatsimmi allaqqareersut malillugit suliakkiisinnaapput.

Taamaattumik Naalakkersuisut Oqaasileriffiup naliliineranut isumaqataapput, aaqqissuussaasumik suliaqarnissaq pillugu inatsisip allanngortinneqarnissaa pisariaqarsorinanngitsoq.

Inussiarnersumik inuulluaqqusilluta



Nivi Olsen